

INUIT ATAQATIGIIT

Inatsisartuni



18.02.2019

UPA2019/123

Allannguut

Siunnersuut 07.01.2019-meersoq taarserpaa

(Allanngortinneqarpoq siunnersuummi kalaallisuuani Pisortanut aningaasatigut allaffissornikkullu kingunerisassai, (250 kr.)-imiit (250.000 kr.)-imut)

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalakkersuisut kingusinnerpaamik UPA2020-imut Aasianni annertuumik innarluutilit angerlarsimaffiannik pilersitsinissaminnut pilersaarusoqqullugit peqquneqarnissaanik siunnersuut.

(Inatsisartunut ilaasortaq, Stine Egede, Inuit Ataqatigiit)

Tungavilersuut:

Nunatsinni Namminersorlutik Oqartussat innarluutilinnut angerlarsimaffiuteqarput illoqarfinni anginerusuni tamangajanni, taakkulu qanoq innarluuteqarneq malillugu, pisinnaasallu malillugit immikkoortitaarput. Taakku ilagaat angerlarsimaffik Ivaaraq Qaqortumiittoq. Ineqartut 15-upput, illunullu marlunnut immikkoortinneqarnikuupput, tassalu tungujortumut, sungaartumullu.

Ineqartut annertuumik innarluutiliupput. Ineqartut nunatsinni aggerfinnit tamaneersuupput, taamaattoq ineqartuni pingajorarterutai, tassalu tallimat Uummannamit Upernavimmiillu agersuupput.

Siornatigut inissaatit 17-iusimagaluartut, "Sungaartuaqqap" matuneratigut 15-iinnanngornikuupput, inissallu tamarmik maanna atorneqarput.

Nalunngilarpullu utaqqisuuteqartugut, aammalu angajoqqaat qasuersaarnissamut pisariaqartitsisartut, tamakkuli periarfissaqartinneqanngillat inissaqanngimmata.

Taamaattumik siunnersuutigaara avannaani, tassalu Aasianni, angerlarsimaffimmik qulinik inissalimmik annertuumik innarluutilinnut angerlarsimaffimmik pilersitsisoqarnissaa.

Aasiaat nunataata maninnera kaamisartakkanik qamutunik atuisunut piukkunnarluinnarpoq.

Aasianniinnissanut siunnersuuteqarninni tungavigaara, maanna innarluutilinnut angerlarsimaffigitavut pioreersut illoqarfinni makkunaniimmata; Tasiilaq, Qaqortoq, Paamiut, Nuuk (sisamat), Maniitsoq, Sisimiut, Ilulissat kiisalu Uummannami.

Taamaattumik tulluarsoraara kommune Qeqertalik allatuulli periarfissalerneqassasoq angerlarsimaffimmik pilersitsivigineqarnissamik.

Maanna Ivaaqami ineqartut avannaanit kingoqqisut eqqarsaatigalugit 18-ileereersimatillutik ukiumut ataasiaannarlutik inatsit atuuttut malillugit tikeraartinneqarsinnaapput. Taamaattumillu aasakkut tikeraarsimagunik juulliliarsinnaaneq ajorput. Eqqarsartaatsimikkullu sulii "meerannguusaramik", naak ukioqqortusereernikuugaluarlutik, misigissutsimikkut erloqinartorsiortartut sulisunit paasitinneqarpunga.

Angajoqqaat arlaqartut Qaqortumut nooqataasariaqartarput, ilaqqat allat ungasissorsuarmitunut mattunneqartutullusooq misigisarput, nalunngilarpummi ullutsinni angalaniarneq qanoq pisariutigalunilu, akisutigisoq.

Inatsisillu atuuttut malillugit angajoqqaat Qaqortumut nuussimagunik ilaqqatinnut tikeraarnissaminut akiliunneqarsinnaajunnaartarput.

Nunaqqatigigatsigit isigisarpavut angajoqqaat tikeraarsimallutik aallalersut qanoq artorsartigisartut, nalunagu ukioq ataaseq qaangiuppat aatsaat tikeraaqqissinnaallutik. Isigalugit misigeqatiginartaqaat.

Kialuunniit meerallip periarfissaqarfigisariaqarpaa meeqqap ineriartornera malinnaavigissallugu, kiisalu meeqqap ilaqqatinnik malinnaavigineqarnissani periarfissarisariaqarpaa. Aamma annertuumik innarluutillip.

Ullumikkut meeqqat arlallit tamanna periarfissarinngilaat, Qaqortumiit avannaanut Qeqertarsuulluunniit Tunuanut ungaseqimmat.

Neriuppunga siunnersuut manna paaseqatigiiffiusumik oqallisigineqarluarumaartoq.

Pisortanut aningaasatigut allaffissornikkullu kingunerisassai:

Taamaammallu suliaq tamanna A/C fuldmægtigip ukiumut akissarsiaasa affaasa iluanni suliarineqarsinnaanera naapertuussorineqarpoq, tassa 250.000 koruunit missaannik naleqartoq.

Namminersortunut aningaasaatigut allaffissornikkullu kingunerisassai:

Soqanngilaq

Innuttaasunut aningaasatigut allaffissornikkullu kingunerisassai:

Soqanngilaq